



鼓山志卷之七

郡人謝肇淛脩葺

徐燭參訂

藝文志一

碑

記

碑

重修湧泉寺碑

宋程邁

鼓山白雲湧泉寺肇始於朱梁開平定慧國師神晏居之自晏至今更住持二十有五歷年二百二十有四真宗皇帝在御之二年始賜院號紹興乙卯福唐大旱斗米千二百有奇主僧法勲負積券一千六百萬錢謝事而去前帥給事張公遷乾元長老士珪董院事珪以儒生棄緣早見龍門佛眼禪師神機默契得大自在解脫

法貫穿經史下至諸子百家之說宿語編續可與論古今天下事得檄之夕負囊以發平日交遊多一時賢士黎民交至問以所闕躡息之間無不辦事於是大敞覺林四方衲子爭先以趨有江左廬山盛時氣象珪方一寢食均勞力汲汲行道啓迪後學安僧衆堂弊甚議大新而增廣之明年更修五百羅漢閣下闢三門傍通兩廊翼以隨閣儼然有飛走之狀又明年創前資湧泉竇猶以爲未也迺於己未歲復立老僧閣

以處高年恐或遺於後進化募五千緡設致長
生度僧會以其餘錢三百餘萬結石為路以便
行又明年大建法堂規模雄大幾冠天下予兄
昭遠喜而為之書額復出其私造十方住持之
塔辛酉脩白雲老宿窩以待觀覽以奉耆舊而
病者之居受業之室亦莫不鼎然一新顧視古
佛大殿壯實不撓姑易其棟而整頓之凡費錢
九千六百餘萬不待勸率人爭以施山中常產
瀕江率在洲渚浮沙聚散出沒不一歲輪納有

司最重所得不償費分遣徒屬窮治淪沒整整
有緒圖籍具存住持六年而內外大小無不備
舉矣夫天下事每成於至誠危者可安敗者可
成難者可易天理默通猶如反掌若非至誠則
人於此不生信心信苟不生何以感格又安能
有成之敏速若此哉予觀珪之施為慊然有感
於心也於是輟公家之餘親紹興十二年五月
望日顯謨閣直學士左中奉大夫知福州軍州
事賜紫金魚袋程邁撰傳法沙門士珪立石

重修鼓山白雲湧泉禪寺碑

宋張 淡

天下之事未有爲而不誠誠而不至充盡夫至誠之道猶不能有克成者佛家者流毀衣糲食惟道是求祖祖相傳師法具在舉措施設雖千萬衆若出一化智者盡謀壯者竭力有餘者分施不足者求人事功敏速不日而成如降於天如出於地如有鬼神陰來相之且其道以清淨不爭爲本無濁惡氣無殺害聲無鬪爭語無私

邪事虛靜平和上格高穹龍天歸仰神佛護持歷世以來天下被患於刀兵水火之厄不知幾數矣而梵宮祕宇羅列山間巍然煥然多有存者借使近市喧雜夤緣回祿之變苟爲名利率免於難夫人而能道之也嗚呼是理真實同諸天地而不昧質諸鬼神而無疑奈何學聖人而不究盡其道使有愧於佛也哉雖然釋氏之先其教甚嚴其儀甚簡其道勤苦而難入食惟充腹擇草木之實以食衣惟蔽體取蒲荷之葉以

衣路宿不再懼有戀意則夫高峻其制丹青其
木平齊其址綵繪其像疑非佛之本心後世通
儒博識多以是而疑其徒也然而實際一塵之
不受建立一法之不遺世間萬法切等空幻聖
賢設心猶有示化運廣大心具堅忍力辦莊嚴
事不信者觀相以生善吝嗇者易慮以出材企
募者捨愛以學道於教不為無補鄴侯當平定
之初大築漢宮闕議者或譏其侈而侯亦自記
以昭示壯觀之意予謂侯深曉世法非小智淺

陋所能窺測也

以下
闕文

紹興十二年檢校少傅崇信軍節度使充萬壽
觀使南陽郡開國公食邑六千六百戶食實封
二千五百戶張淡撰文顯謨閣直學士左中奉
大夫知福州軍州事兼管內勸農使充福建路
安撫使馬步軍都總管文安縣開國子食邑六
百戶賜紫金魚袋程邁篆額左朝奉郎充福建
路安撫使司參議官何大珪書丹

鼓山湧泉禪新脩忠懿王祠堂碑

宋王 廊

五代之間諸侯割據天下瓜剖訓練士卒更相
吞噬而佛法獨盛於其時以國王大臣猶能傾
心奉道人重法故也當是時孟氏起西蜀錢氏
據浙右李氏守江南以至閩之王氏皆嚴塔廟
崇聖教以相高國事休豫留神虛寂延訪高僧
咨求法要間有奇偉之士出乎其時擔荷大教
激揚妙旨片言悟主爲王者師若劔南法眼浙
右智覺西蜀禪月閩則開山興聖國師是也嗟

乎輕千乘之尊隆禮於匹夫以道之所存故重
道而忘勢倘非夙鍾願力承佛記授來爲外護
者詎能如是耶茲山建中四年肇造佛祠靈嶠
禪師居之遇會昌之難鞠爲榛莽七十餘年王
氏考其遺迹中興之而興聖國師出焉自是四
方淨侶雲集霧擁王氏傾貲給施寵賚金繒殆
無虛日因資其餘羨啓闢田疇養徒巖谷使學
道之士得棲神淨域不以衣食嬰其心王氏之
賜也追國師示寂繼踵者十五代乃至定慧大

師來主是山曾未半紀廢事畢舉甲午歲始卜
上方剏王氏祠宇嚴香燈奉薦羞晨夕無闕每
於諱日營齋供僧資彼淨土之報亦不忘其德
也穎川陳彬捐金二萬委下院庫主僧轉質歲
收其息於王氏齋日以助施僧噫閩佛刹千有
餘區本其興廢皆王氏績其協力奉教如是後
之蒙澤者立其祠宇謹其祀事不亦宜乎庸錄
其本末使後之覽者詳焉白龍禪院住持傳法
沙門王廓撰聖宋元祐三年十月初四日住持

傳法賜紫定慧大師顯宗新授建陽縣主簿陸
恂書朝散郎致事輕車都尉賜緋魚袋黃子春
立

重建鼓山禪寺廨院碑

明王克復 福清人

鼓山距冶城東二十里其絕頂有寺山之西麓
爲廨院以接賓客栖旅僧理錢穀實寺之別館
也主僧常擇徒之能者治其事而寺以無擾寺
創梁開平二年自政和以來值寇兵水火之變

經幾廢興弘治辛亥厄於回祿癸丑復被山水
所潰都綱德丰與其徒慧欽顧力不贍乃以其
事請于欽差總鎮陳道公慨然捐貲爲倡度材
礱石工役大興前爲門中爲觀音殿後爲法堂
凡僧房庖庫之屬靡不畢具壯固宏麗超越前
規經始於是年四月落成於甲寅正月惠欽間
詣予道其事請爲之文刻諸石予惟鼓山全閩
勝境也其山自雪峰來鸞翔鶴翥突然出於羣
山之間雄偉峭拔崖谷環複其南則虎頭諸峰

如筆格如蓮花如牛羊驅而獅象蒼蒼然皆來
也其東則巨海汪洋當風收烟歛萬里一碧遠
而琉球諸山咸在目睫之下西北則郡城百雉
市廛闐闐雜遝鱗次而是寺實據江山之會名
公鉅卿騷人墨客登眺遊覽者殆無虛日遠方
來閩而往遊者十常八九人焉閩雖多名刹若
茲寺蓋不可以甲乙數而解院又寺之廢興所
由者也然非得人以振其墜舉其廢則將爲涼
烟白草之區寺雖勝其何憑藉而可久乎今總

鎮公於撫綏之暇乃能留情名勝加惠沙門輪
奘之功適觀其成所謂境不自勝因人而勝其
所係豈輕哉惜予不文無以發揚公之盛美以
傳於無窮因其請姑書此以記歲月可得而略
云大明弘治七年歲在甲寅春二月 賜進士
第進階正奉大夫吏部右侍郎前都察院右副
都御史王融王克復撰 賜進士第通奉大夫
正治卿都察院右副都御史新寧謝士元篆額
賜進士第通奉大夫正治卿廣東布政使司

右布政使三山謝瑀書丹

新開白雲洞碑

謝肇淛

長樂人

夫山川無盡而人有盡以有盡遇無盡故耳目
所不及接手足所不及探率付之無可奈何以
還造化而山川之遇合顯晦又自有時前之荆
者常留其無盡以俟後之人非其人山靈不與
也閩鼓山之有湧泉也自僧靈嶠始也其巖之
喝水也自僧神晏始也而洞之有白雲也自僧
悟宗始也悟宗出世學道苦行精進隱國師巖

者二載編茅居鳳池者五六載戒律堅定天人
護持每夜見圓光從他峰飛至熠熠燭天初謂
野燒繼疑遊燐久而踪跡之披榛五里許而得
石穿石抉土土盡而得洞二上小者爲海音洞
稍下高廣延袤二丈許如覆鐘如削玉者爲白
雲洞洞前空青隆然起者爲佛頭巖巖石稍坦
者爲說法臺臺傍爲潭卽識所謂三潭九井之
一云而石之仰者爲鉢盂者爲禪杖皆以形似
名也登洞則日月蔽虧雲霞從足底生滅長江

如帶巨海若杯而無諸城郭隱見烟中一蟻垤
耳悟宗性行超凡慧心獨運鳩工蒐材鼎建祠
廡而同事有善乩卜者護法伽藍憑焉言應如
響於是遠近雲集布舍物力畢具金身碧殿精
舍香厨不月而成巋然之觀然下視斗崖絕壁
勢踰天險自非猿猱難以飛度則又鑿石千武
懸梯萬仞起於平地爲三天門蛇屈而登跨龍
背渡吼雷湫印月潭踰金剛石數百級至化龍
橋觀瀑布如綫散入橋下天梯矗雲巖巖然王

懋復太史爲題白雲洞天行者兩膝擊顙肩高
於頂喘於吳牛而未得休也雖折筍之嶮巖大
嶧之窳窳蔑以加焉嘻亦奇矣自有宇宙便有
此山神僧之所剖闢高賢之所杖屨經百千萬
劫所未見之奇至今日以無意得之而悟宗者
又孑然一身耳不內交豪右不借資陶猗一旦
稽天鑿地別開世界非神識大力不至此豈靈
嶠神晏所留以俟其人者耶悟宗後居郡城之
羅山羅山法海寺爲勢豪所奪且一甲子歷數
主矣而能引法曲諭頓令檀那發心捨宅還寺
不三年間金碧珠林煥復舊觀光復聖教法力
尤弘其開白雲洞又藐然者耳余時方志鼓山
感高僧之遺事而嘉悟宗之能嗣其鉢也於是
乎記洞開於萬曆丙戌而天門鑿於甲午悟宗
俗姓傅氏郡之閩縣人萬曆戊申七月望日前
進士兵部尚書郎陳留謝肇淛撰

重興鼓山寺田碑

葉向高

福清人

夫天下之號叢林衆矣有其興之胡可廢也其

廢之以幻教細其廢之而不與廢也以祝聖義
不得細其廢之以乏物力細其廢而復興興之
於垂廢日也長吏之所護持神功之所托庇義
又不得細噫嘻興廢之故蓋難言之矣吾郡以
鼓山爲鉅鎮寺建於梁開平其不戒於火也以
明弘治辛亥其見潰於水也以癸丑寺就燔
且圯矣獨山下至厩院禪房蘭若巋然若魯靈
光而以輸租以焚修以餉衆僧以當供億以需
詞人墨客之登臨一切取辦於檀那之田田爲

畝者以七千計後裁其五之一者寄諸學佃人
雖得以稔若稔輸而額仍隸寺僧坐受困矣尋
以兵興餉重吏持之急豪右乘其困耽耽虎視
且侵漁焉縉紳之倉箱日溢而苾芻如洗計有
鼠雀竄耳歲乙巳王令公之入閩也輒彈指悔
恨疇爲名刹而榛蕪若此疇爲租庸而逋逃若
此疇爲金身丈六而剝蝕若此抑何以爲呼嵩
者地也實邑宰重貽之羞遂括故牒按舊額清
夙通蠲苛役籍汗邪之蝕於豪者奏記於左轄

范公旣報可矣隨清淨糧之累僧者三十餘石未幾令公入覲闕者復起孫守公以定力勝之右轄陳公督撫中丞徐公以全力護之而督學熊公雅不欲諸生之有加於僧也于是田之歸寺者種種矣令公又察比丘性聰之負荷也籍而授之而聽輒薰沐和南不腆山靈惠徼令公借此法力飽茲香積令公及諸大夫其永有譽於恒河沙世世功德在卓錫無央無邊其志之貞珉以垂不朽而請余記其事余謂是役也諸

大夫之賜也令公之力也爲山者尸祝於一簣而穿井以一畝爲功則謂令公什伯於諸大夫可也因論茲寺亦阨危矣一阨於祝融再阨於波臣危廢矣廢而復興天實爲之而田復厄於豪以祝融波臣之不能與豪格也豪之不能與良令格也亦天意矣天不欲令此田久蝕於豪而沙彌輩不能任故假之良令之手又欲使良令樹德建功千秋百世假此少試經綸之技豈天意奉令公耶令公在余四封之內郡人頌其

廉而謙敏而斷彊直而溫厚治行在五鳳神爵
間非久當內召侍臺端直左掖而斯寺之祝令
公與山俱敞可也後之感興廢者當於是乎考
之徐公名學聚蘭谿人癸未進士范公名涑歙
縣人甲戌進士陳公名所學景陵人癸未進士
熊公名尚文豐城人孫公名大壯黃岡人俱乙
未進士王公名世德永康人辛丑進士法得並
書大明萬曆丁未冬 賜進士出身資善大夫
禮部尚書兼東閣大學士福唐葉向高撰

記

請雨記

宋徐鹿卿

豐城人幹
辦公事

紹定壬辰夏六月不雨至于秋七月徧走羣祀
未效大帥番陽李公以石鼓闔重鎮其下衆水
所匯必出雲爲風雨乃命屬吏南昌徐鹿卿致
禱丙申詣寺齋宿丁酉黎明登巔禮畢而雨
是夕大雨戊戌又大雨己亥雨止稿者獲潤者
流刻而識之侈神之休

元真菴記

明僧株宏

錢塘人雲
栖寺僧

許國威自號元真居士而福城以東十餘里鼓山之勝居士菴其中卽以厥號名菴曰元真菴嘗考華嚴福城東去有娑羅林林有塔廟文殊師利童子教善財童子處也夫不壞元真名之曰童茲居士跨海內論兵底有成績倦遊而歸真以是人居是地而適與華嚴所稱福城冥契所稱童子冥契似非偶然者可弗顧名而思義乎假居士樹立摹麟閣圖雲臺如夢如幻妄也非吾真也吾歸吾真矣一歸永歸予重有囑焉

是爲記萬曆癸卯上元古杭雲棲寺沙門祿宏識

元真菴記

卜履吉

上元人福州府推官

夫外象幪虛窮無之妙斯著先天何物未始之徵罔聞故博觀則無相不入冥邈則有力同淪不可以未畫傳不可無極悟大矣哉其涅槃之旨也蓋自西方誕聖滅雪墮其飛仙中土撫期恒河欽其荒界法流旣遠象教遂夷然後帝振革蘖淪響振於迦陵王夢審求緘經尊於石室

齊梁表刹於方輿林遠護門於未墜異代全情
固亦有焉昔者越都熄伯巋峙鼓山之存蜀土
遊魂異托沙門之夢於是碧天禪師道庇交喪
濟緣未來固已借冥力於西椒顏白雲於闢石
矣干霄蔡刺俯睨天門蕩邪之池華清蔽徑之
竹峭舊蓋閩東之勝地也萬曆二十七年將軍
許公諱國威閩人也其神化韜略飛霜細柳寧
需函谷之泥噓風大樹已紀燕然之石旣而漢
閣讓麟華山歸馬負趨夜壑悟返出門之車探

取鄰環妙湛受輪之器遂於洞下立元真菴以
庇經像復爲堂中形大覺之額以發果體焉芟
薙授模卜中夏而經始崇構留觀閱初秋而竣
事迺岡巖鬱抱雲霞舒卷背以佛頭雙髻之奇
表以蓮峰方山之秀三山抗虎孤峙降龍長江
獻其天塹萬落效其碁跣亦已暢無窮之盈視
極安閑之世界矣藉鉢於馬證玄趺坐於馬入
定可謂靈鷲移山菴羅別舍者乎是舉也偶物
闡勝地傑輝於當符鏤文紀伐世遠著其可知

敢寓言於不朽庶弘範之無歇其辭曰幹維馬
繫形上難名睠彼羣族西方篤生極妙無上想
體圓明衆生斯瘼愛流成瀛爰造淨土皇濟恒
沙超諸填坑煩惱萬差闡提三昧息言拈花允
讚多士正象流遐玄關不鍵秕莢迺治教始等
慈靈亦殉鷲霜露所墜戾止大庇苦海慈淪祇
園易施邈矣漢臺列刹惟弁冠山垂葩煥若舒
電聚珍旣賁若華易揚瞻茲靈宇日月齊光勝
地不易乘數聞章於昭至教替崇未央

元真菴記

僧廣靖

元真菴者元真居士自捐俸所創也堂額大覺
志覺已覺人也居士生而好佛癖嗜內典參訪
多方習靜無地近乃投戈林下慕閩東鼓山西
麓白雲洞之勝洞據山之巔摩霄咫尺人跡罕
到時維白雲縹緲而已有石橫亘十餘丈深二
丈巔屹屹峙白乳時流前有天池左右有翠竹
下有三天門門俱自然蒼石夾立門之上則瀑
布飛流四時不絕闢是洞者悟宗上人也上人

戒行精嚴信心深篤五丁托夢石穴自開居士
結菴於下依爲勝友菴之景蓮峰送秀方山拱
色三山萬雉爭入眉睫佛頭巖插其鬢雙髻峰
鎖其口龍脊岡跨其背菴依洞洞依菴天造人
設默有相成時一陰晦咫尺不分時一清霽萬
里在目時一閉關入定則塵囂都泯法界混融
時一臨高遠望則舟楫往來耒耜交錯僉云極
樂之土可以演習上乘客有登陟肩輿可到若
洞在絕巔磴道孤危非捫蘿附葛莫能至是菴
之兆工也以萬曆庚子五月中旬完以七月終
旬費錢十萬擇是地者莆堪輿翁友雲董是役
者山下老人鄭九道也居士姓許名國威閩人
癸未武進士歷官征倭遊擊元真其道號也乃
取元明真心之義云萬曆庚子中秋記

鼓山寺興復寺田記

陳柯

閩縣人

閩鼓山自東山獅子峰發源而南重岡疊嶂壁
立萬仞山頂石結如鼎金磨盤狀人跡所到磬

蓊然作鼓聲故名曰鼓山爲省藩左臂山頂俯
視城郭中猶魚鱗瓦片人居輻輳烟霞花錦盡
在目中山脉油油入江東接琉球南通海嶼旗
山在西爲之右弼如旌旗附鼓云古人遊歷趾
至有天風海濤高山仰止書刻下有喝水巖神
僧自此昇天故祖師知其爲勝地也住持此山
而閩中善良故老有德行者交獻田地而興起
之至嘉靖末年當權者瓜奪其田忍爲廢寺之
議僧霞居與其徒玄深念念祖師努力扶持恢

復恭逢 今上皇帝登極一遵祖師成法不忍
輕廢禪祠而復之僧玄深才足通方敏諳世務
智能服衆由是田土以官丈均稅額以公道明
豪右以併奪息徭役不愆于歲時應酬不忤于
縉紳周旋不戾于有司則寺宇崢嶸山川秀發
千百年景象昭然在今有司因其長於會計也
又委兼管龍瑞歲田鄉民善之夫遠能恢張聖
教而近能修舉廢墜上不負公家之委任而下
與其徒明內典以振其業吾知玄深非凡僧也

故爲之記其始末云萬曆歲次乙酉秋日 賜
進士出身大中大夫江西布政司左叅政郡人
陳柯撰

鼓山寺復田記

陳 義 閩縣人

福郡城東三十里有鼓山閩之第一山也山有
寺而寺有田傳自唐宋而盛於朱梁閩越之時
其人之尊教者各輸腴田以爲福田利益之基
故其田遍福之諸邑一邑之所治者歲入之數
賦公家五百石他未暇論也向當盛時寺僧百

數司釋教者不倦而寺賦之出入擇其才且潔
者董其事以羨補不足使公家之賦無缺寺衆
之費有餘迨後持戒者寡糜費之事繁窺伺者
衆侵奪之禍起日削月朘賦歛大逋指田質貸
而奸猾自肥之甯啓矣嗣又倭寇患叢軍國需
急蓋有不得不增餉於常賦之外者而寺之敝
益甚僧衆或竄於山林或歸於本宗寺之不廢
者一縷耳前住持法偉旣竄而又還矢志圖復
未幾而坎坷相尋世緣忽謝永訣之際以興復

之事屬其徒玄深玄深凜凜受教次第興復輸
足逋負以其餘力葺亭宇粧佛像上焉不失公
家之賦下焉招徠鳥窠之侶俾孤峰廢寺駸駸
然有重興之勢其功不少也夫天下之事未有
志而不遂爲而不成者也誠積以堅定之念而
乘以拮据之勤循以精苦之行而持以悠永之
功雖國家至計籌畫惟艱而志嚮精專勳業必
就矧一寺之委瑣廢墜非不可復收拾者乎吾
於玄深有取也茲寺之先開山拓基則有神晏
弘業中興則有了心今得玄深而三矣吾知茲
寺之興尚未有艾也玄深黃姓勉齋先生之裔
萬曆乙酉秋九月八日郡人陳義記

遊鼓山記

吳海 閩縣人

福爲八閩都會上四郡皆山地勢局促不能廓
以舒下皆濱海風氣䟽蕩不能隩以周惟是州
處其中不蕩不局得二者之宜環州之山惟東
石鼓爲最高能興雲雨蓋州之望也歲乙巳九
月十五日郡人黃伯弘約予與廣平程伯崇建

安徐宗度自河口買舟順流而下抵白雲禪寺
時日已西過東際石橋橋覆以亭流水出其下
潺潺有聲沿麓稍登澗鳴在左荔陰團團有大
石可坐近里許有亭曰乘雲近亭有竅泉行者
掬以飲又里許到半山亭亭後小豁俯瞰山下
又里許閣曰圓通憇焉閣外踈竹斜映倚闌平
睇江流二道如白虹遊龍縈帶長洲靡馬而東
趨漁歌互答西山凝暉碧翠異狀前登嶺路景
射人背轉而右見奇光玲瓏飾林若金點綴樹

上如花嬰條如菓有葉華彩相映瑰麗不可名
狀玩之久而後去又轉而上皆幽林清樹半里
許夾道有小松曰松關日已下山暝色將歛促
行度岬表曰全閩第一峰下小坂皆平途左爲
矮垣迤邐達寺已昏黑訪法上人宿于超凡閣
越明日逕寺右行蔬畦間度松林二三百步入
叢篁中徑傍小竹微露綴其上如珠時滴人衣
覺清爽出篁竹皆微蹊二里許登小頂峰峰直
寺後下視殿閣若騎其尾西望郡城列雉數千

市廛闐闐雜沓鱗次麗譙浮圖臺門府寺釋老
之宮輝霍崇麗闐出其間州邑之雄可謂罕儷
舊時村墟野落化爲瓦礫之場而居者鮮矣由
小頂而上又里許至大頂使僮僕行前伐灌莽
披荆棘擬步而後可進若是二百舉武少轉而
南然後造乎劣崩之巔行者盡疲人以意擇石
而坐午食畢仍拂石刻觀晦翁大字讀沈公蟻
銘摩挲徐鹿卿請雨記記漫久乃可辨時空晴
景明萬象呈露幽音詭異不待搜剔自來獻狀

使人倏然而塵慮消澹然而情境融極目西北
諸峰若數百里攢者鶩者凌者闔者攘者赴者
突者筵者特立獨出者齧齧劔戟者西南諸峰
若雲矗波湧若牛羊驅若車馬馳近至數十里
之內皆周旋徘徊頓伏安帖間之以溪壑流之
以江河蓋自劔邵來者至水西旗山而止自汀
泉來者至水南方山而止自建來者至是山而
止若夫建劔汀邵之溪合流至于洪塘分爲二
江南過石頭納永福之溪與賴溪出西峽北過

新步亦分于二又合而至于長隄乃與西峽江
合過石馬下洞受長樂港與賈港出閩安鎮而
入于海東南彌望浩蕩不可極遠至于琉球之
國近而梅花南交諸島咸在五步之內自永福
閩清長樂以至於福清之境歷歷可見焉迴眺
附城諸山前者若迎後者若隨左右環輔森列
若大將之治旅尊嚴閒暇部伍整肅秩然不亂
南州諸山若鸞翔鶴翥丘垤礪礪若子之在枰
耳滄溟無波上下同色輕颺徐來綠皺千里潮

落渚出平沙衍迤蒼鳶白鳥共下齊起日既暮
乃刊木爲堂束薪爲門薦蓆以莽綴樹張帳寺
僧持雞黍來餉亦共宿焉中宵露零月色如午
剛風忽起陰壑雷動出而視之立不能定五鼓
愈甚衆相與促衾聯立東望扶桑以候朝旭奔
星矢馳四面相射有玄雲橫亘在海面高四五
丈不得視其初出之景須臾日上已高山烟水
霏蒼茫遠近隱顯迭出恍然如畫圖中又一奇
也露晞下山至寺已近午出寺左遊靈源洞石

磴垂梯兩崖崇墉通以石梁白雲亭其上坐稍
久洞谷生風時來襲人起觀蔡君謨書有奇石
立道側若甲卒號將軍石於是履危棧度石門
求晦翁題名趙子直詩抵天風海濤之亭極焉
孤撐巉巖憑闌欲墮川分谷擘江面如沼險絕
清曠遂兼得之盤桓至日晡誦楊志行古篇還
宿法上人禪房又明日復登超凡閣伯崇題詩
閣上觀王氏賜神晏書乃歸是遊也比之常觀
蓋不侔矣夫升崕嶮者隘一方陟岡阜者薄百
里乃是縱目力於霄漢納溟渤於胸次晦冥晝
夜收拾舉盞豈非所處者益高所見者益遠所
造者益深則所獲益富古人登東山而小魯登
泰山而小天下愚雖不及竊冥會之矣嗟夫山
川萬古世變無窮景物雖同人心異感是遊豈
徒登覽之娛有以散其憂愁拂鬱之恩發其豪
宕雄逸之氣重其治亂興亡之感而峴首之悲
牛山之念仰止之慕雖吾四人者亦詎能盡同
也且是山昔人莫不登之近百年來人跡罕到

自予始登命樵夫爲導亦不知其路乃緣壑徑
上顛踣者屢而後得至其所忽得舊路循之而
下果達寺蓋宋時所闢而僧除之始絕頂皆短
荆無林木今可張幄矣始寺外多數百歲古樹
今但見新植矣嚮予始登幾三十年重來二十
餘年與伯弘來亦十五六年今復得與諸君遊
此而予髮種種矣因刻銘山石而記其詳約後
遊復紀之較方來尚幾遊也

重遊鼓山記

歲癸兆執徐吳子客居董山下出門面鼓山唯
限一水自初秋卽約數人同登旣而七月中雨
八月中又雨約重九重九復雨閏月雨不止所
與約諸人咸以事違然予意獨勤念過此則冬
氣將厲寒不能登矣十月十一日風定無雲里
中陳垣士周彭垠德彌吳杲孝升三人皆舍遽
相從凌晨渡江自蓬岐入荔林依山右行瞰旭
宇霽道傍野花炫耀黃碧色霜林葉如染采山
果可噉澗中泉韻琮琤鳥聲吟哢飛來近人若

相娛二里許至岐路乃絕壑橫渡小石杠遇數
人家復有岐路當右有少年坐石上給曰左乃
左行由屋後躋石磴崎嶇嶮峻近二里所達路
寄衣鳥寺中升數岡則篁竹深密不可尋路有
逕趨山右竝崖而進雖覺異然意可得達遂循
之里許值窮見水源而返蓋寺中引泉處也退
而披篁刊木剪伐樵翳登樹而望向高直上攀
緣躡蹬三里許然後榛莽之中略有微谿可辨
衆共喜進五六百步果至峰頂人不勝其勞憊
息良久尊酌屢行然後徐起徘徊瞻眺意旣適
則又樂而忘罷矣訪予曩年宿處荒穢特甚不
可以前下山日將暮月已升東不能復覽洞中
諸勝出近南寺得村氓引導暝黑穿林中歷畝
田指示詳悉乃乘月度嶺上下緣麥隴中取道
抵灰岐喚舟從西岸來濟及家將二鼓矣是遊
雖不能從容若疇昔然於世故沉困憔悴無
聊之中得一日之暇以紓憂釋慮將亦不易得
耳復憶十數年前城中倪林二子屢常欲登以

不得予偕而止者五六遂終身不能登今予屢
登而二子在泉下不可作矣因忽感念涕泗爲
零二子倪則桂德芳林則琦公偉也

遊鼓山記

陳

智

武昌人

福建統八郡而福郡爲腹心環城四面巋然者
皆山惟石鼓萃嶽巍大爲最能藏蛟龍興雲雨
蓋邦中之望也中有白雲湧泉禪刹在焉永樂
壬辰余奉命來按是邦聞有茲山之勝距城不
及三舍然職在咨諏糾繩不暇登覽而心猶倦

倦焉今歲甲午春正月三日風日和煦遂拉同
寅李公偉平日連騎出城東際所過村墟農務
方殷田原整整野水泠泠白鷺飛而黃牛健耕
者各執犁鋤皆知力本甚爲之喜已而帥閩都
指揮王公觀藩府左布政使麻公冕右布政使
鄒公昱叅議辛公彥博楊公鼎憲府僉事楊公
張公馮公聞之策馬偕來日稍高至山下寺僧
五六輩出迎入廨宇瀹茗焚香頗有清致出立
萬年峰下仰視鳥道靳絕凌雲苔蘚徑滑馬難

於行命籃輿徐步而上由荔林度東際橋里許
有亭曰乘雲側泉一泓甘寒可掬飲又里許亭
曰半山境勢豁然由亭而上僅數百武亭曰圓
通遂偕下籃輿少憩馬亭外修篁數百竿色玉
可愛俯睇江流二道如組練如白虹由亭左登
嶺嶺勢益峭却有丹葩翠蓋日射眩曜玩之久
而後去又曲上一里許曰松關喬松夾道儼若
髯龍天風時來響音四起如鶴鶴之呖猩猩之
嘯迺促僕御亟度岷表曰全閩第一峰遂下峻

坂路始坦夷從石門至鼓山亭迤邐達寺主僧
都綱了心悉率緇流迓至堂撞鐘考鼓聲震潮
音乃肅衣冠禮金仙大雄詢興聖閩王二祠登
超凡閣使人心神澄朗萬有俱空宛如入祇園
雙樹雨花之界日向午由寺左旋入靈源洞洞
口狹小中甚宏廓遂陟白雲亭觀喝水巖至于
湧泉觀陸公扁盤桓佇立摩挲崖石閱古今名
公鉅卿詩記日向西循仄徑蹇蘿而上至小頂
峰所登益高所見益遠東則大海迥接琉球渺

如一髮烟濤雪浪浩浩無垠其間百恠千竒不可殫極西則郡城雉堞麗譙公府與夫琳宮梵宇金碧輝映闐闐數百鱗次高下參錯於三神紫翠間繁華佳麗他郡罕儔極目南北則諸峰林立如綺繡如芙蓉如虎踞龍蟠如鸞翔鳳翥如牛馬疾驅如矛戟森列如大將尊嚴如忠臣蹇諤如仙侶飄飄使人豪宕雄逸飄然有出塵想又由小頂而登大頂而造巔從者盡疲余與諸君長歌起舞舉觴勸酬爵無筭旣醉抵天

風海濤極焉則剝苔讀碑慷慨吊古觀晦庵朱先生遺墨因其墨思其人想其道學文章事業是雖曾點童冠之風雩右軍蘭亭之修禊其樂無以加也抑吾聞先正有言君子後天下之樂而樂方今聖皇奄有萬國海宇雍熙諸公膺藩屏耳目之寄又能殫厥心力奉宣德意俾八郡黎元沐休嘉樂生業天地無水旱凶荒之虞比屋無札瘥疫癘之患時和歲豐少長嬉遨而吾輩遂得以優游暇豫登高覽勝豈非所謂後天

下之樂而樂者耶且以當情狀景瀾瀾乎鏗鏘
之音又於諸公佳什見之予特書此以爲記云
昔大明永樂十二年歲在甲午首春三日巡按
福建監察御史武昌陳智書

遊鼓山記

游

明豐城人

成化二年春正月大行人安成阮君玘奉 詔
來閩事竣過憲臺告別謂予曰聞城東鼓山爲
閩中竒觀惜值雨弗克以游耳余曰 皇上覃
恩海宇人物與春俱新山遊觀民風適其時矣

君能留一日天必霽余當同往明日丙寅天果
霽於是憲副嚴陵郎君汝彬四明錢君廷珍雲
間浦君宗源憲僉南昌劉君敬之姚江朱君士
弘暨余六人各乘肩輿從卒攜具辰出東門過
康山憇東嶽廟遲阮君至乃行時風日晴明人
體和適所過村落桃李花紅白相間錯香氣拂
襲人衣袂綠秧盈疇耕者鱗次比屋弦誦聲相
聞老穉欣欣然沿道而聚觀竊嘆其地得氣候
之先人務農事之早而風俗之淳且熙也去城

二十里始至鼓山之麓僧綱率僧五七輩迎入
解院酒三行卽起由東際橋躋石磴曲折而上
可一里過乘雲亭又里許至半山亭輿夫息肩
復行半里有奇穿圓通亭又半里度岷竝山腰
而轉一里所有深谷其中豁如白雲湧泉寺在
焉主僧率其徒迎道左入門望大頂小頂二峰
如屏障蔽其後左右兩山迴合清幽深邃真聖
境也遂由山門登法堂茶罷玩不動軒日卓午
矣飯畢出由門左徒行入靈源洞轉東而北幾

五十步有橋跨石竇曰蹴鼈上有亭曰白雲渡
橋循澗而北三五步觀喝水巖舊傳寺僧神晏
常誦經於此惡澗水喧轟鳴之遂涸蓋誕妄不
足信傍巖而南又折以東可三十餘步一亭曰
湧泉泉出亭右石竇間冬夏不竭鑿石甃小池
貯之清冷可掬沿巖曲轉而南約四十步有石
砥立若門然可通一人行所謂石門也又轉東
而南四十餘步一亭楣間揭天風海濤四字疑
卽古之水雲亭也自入洞至是亭崖石間名人

賢士之題誌在在有之若宋相李忠定公晦翁
朱夫子皆有記遊歲月亭北可登絕頂而崖巖
嶮褊塞衆憚于躋攀阮君曰吾之來正欲臨絕
頂縱心目而訪古跡也遂翼二卒以登劉君繼
之主僧暨十數卒魚貫而上予五人坐良久徐
步從故道還湧泉亭以俟乃擘雞豚傳觴數行
予不能飲起而西顧日將晡矣飲畢還寺門望
二君方從小頂峰而下予五人因以二君之姓
共論劉阮入桃源故事聯劉阮入桃源詩一律

甫成而二君至爲誦之共發一嘯阮君言自亭
北以往登臨愈高躋躡愈艱而紀游者益少至
大頂峰磐石上游目四顧東則巨海茫無際崖
琉球諸國隱約霧靄間西則三山州城百雉烟
火萬家重江如練帶環繞郭郭南北則層巒疊
嶂蜿蜒起伏若圖畫然頂上舊有望州亭廢已
久惟石上刻天風海濤四字乃晦翁遺墨卽今
勒而揭之水雲亭者又刻有熙寧中丁福州竦
沈提刑紳輩所作鼓山銘摩洗讀之其文甚古

相與據石而坐撫今思昔悵然者久之由西南
降至小頂峰憑卒肩而下念今日得以覽山川
之勝民俗之美者本以君賜而歲月不可以無
紀余諾之復乘肩輿還解院酒再行日已暝命
卒秉火炬燭路以歸又明日丁卯阮君別復叮
嚙作是記以寄旣祖而歸因歷記其事一寄阮
君一畀主僧刻諸崖石云 賜進士出身奉議
大夫奉勅提督學校福建等處提刑按察司僉
事豐城游明大昇記

